

Republika e Kosovës
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBEKOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.288/2020

Këshilli i Pavarur Mbikëqyrës për Shërbimin Civil të Kosovës - Kolegji për shqyrtimin dhe vendosjen e ankesave në përbërje nga: Malsore Gashi-Bajraktari-kryetare, Jeton Koca dhe Eshref Shabani-anëtar, dhe Rushit Kajtazi -Zyrtar i lartë për Bashkëpunim Profesional në cilësinë e procesmbajtësit, ka shqyrtuar ankesën me numër A.nr.288/2020 të datës 07.10.2020 të parashtruar nga ankuesi [REDACTED] [REDACTED] adresa lagja "Qëndresa", Komuna e Prishtinës, kundër Vendimit me numër 1523 të datës 01.10.2020 të Ministrit të Ministrisë së Ekonomisë dhe Ambientit, në çështjen juridike "pezullim nga marrëdhënia e punës", duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.2 dhe 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datën 19.11.2020, mori këtë

V E N D I M

I.SHFUQIZOHET Vendimi me numër 1523 i datës 01.10.2020, i Ministrit të Ministrisë së Ekonomisë dhe Ambientit.

II. OBLIGOHET Këshilli Shtetëror për Vlerësim dhe Disiplinë, që brenda afatit prej 15 ditësh nga dita e pranimit të këtij vendimi, të shqyrtoj lëndën sipas shkresës-njoftimit me numër 1524 të datës 01.10.2020, të parashtruar nga Ministri i Ministrisë së Ekonomisë dhe Ambientit,.

III. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

IV. Vendimi hyn në fuqi në ditën e nënshkrimit nga Kryetari i Kolegjit.

A r s y e t i m

Me datë 01.10.2020 Ministri i Ministrisë së Ekonomisë dhe Ambientit, ka nxjerr vendim me numër 1523 me të cilin e ka pezulluar nga detyra me 50% të pagës ankuesin [REDACTED], Drejtor Ekzekutiv në Agjencinë për Mbrojtjen e Mjedisit në Ministrinë e Ekonomisë dhe Ambientit.



Ministri i Ministrisë së Ekonomisë dhe Ambientit, po ashtu me datë 01.10.2020 ka dorëzuar shkresën-kërkesën me numër protokolli 1524 për Këshillin Shtetëror për Vlerësim dhe Disiplinë për fillimin e procedurës disiplinore ndaj Kryeshefit Ekzekutiv të Agjencisë për Mbrojtjen e Mjedisit në Ministrinë e Ekonomisë dhe Ambientit z. [REDAKTUAR] për shkak të shkeljeve të rënda të detyrës zyrtare.

Ankuesi [REDAKTUAR], i pakënaqur me vendimin me numër 1523 të datës 01.10.2020 të Ministrit të Ministrisë së Ekonomisë dhe Ambientit, me datë 07.10.2020 parashtron ankesë në Këshillin e Pavarur Mbikëqyrës për Shërbimin Civil të Kosovës.

Këshilli i Pavarur Mbikëqyrës për Shërbimin Civil i Kosovës, më datë 15.10.2020 ka kërkuar përgjigje në ankesën e ankuesit nga Ministria e Ekonomisë dhe Ambientit, ndërsa Këshilli më datë 23.10.2020 ka pranuar përgjigjen në ankesë nga Ministria e Ekonomisë dhe Ambientit bashkë me shkresat e bashkëngjitura të lëndës.

Kolegji për shqyrtimin dhe vendosjen e ankesave ka administruar këto prova: *Kolegji për shqyrtimin e ankesave ka administruar këto prova:* Ankesën A nr. 288/2020 e datës 07.10.2020, me numër protokolli 2008/2020, drejtuar Këshillit të Pavarur Mbikëqyrës për Shërbimin Civil të Kosovës; Vendimi i datës 01.10.2020, i Ministrit të Ministrisë së Ekonomisë dhe Ambientit; Njoftimi për inicim te procedurës disiplinore i datës 01.10.2020 i Ministrit të Ministrisë së Ekonomisë dhe Ambientit drejtuar Ministrit të Punëve të Brendshme dhe Kryeministrit të Qeverisë së Republikës së Kosovës; E-maili i datës 07.10.2020; Vendimi i datës 26.08.2020; Vendimi i datës 25.09.2020; Vendimi i datës 06.06.2006; Vendimi i datës 27.06.2006; Vendimi i datës 17.08.2012; Vendimi i datës 05.08.2015; Vendimi i datës 12.02.2019; Raporti i auditimit për vitin 2018; E-mailin e datës 16.05.2018 nga Luan Sabedinaj për [REDAKTUAR] E-mailin e datës 07.02.2019 nga Luan Sabedinaj për [REDAKTUAR] E-mailin e datës 03.08.2020 nga Agim Radoniqi për Luan Sabedinaj; E-mailin e datës 19.08.2020 nga Luan Sabedinaj për [REDAKTUAR]; E-mailin e datës 19.08.2020 nga [REDAKTUAR] për Luan Sabedinaj; Përgjigje në ankesë e datës 23.10.2020, me numër protokolli 2233/2020, me shkresat e bashkëngjitura.

Kolegji për shqyrtimin e ankesave, për vendosjen e kësaj çështjeje ka shqyrtuar të gjitha shkresat e lëndës të bashkëngjitura nga ankuesi dhe po ashtu edhe nga organi i punësimit dhe ka vërtetuar se ekziston baza ligjore për vendosje, duke obliguar Këshillin Shtetëror për Vlerësim dhe Disiplinë, që t'i ndër marr të gjitha veprimet për ta shqyrtuar lëndën lidhur me çështjen e „pezullimit nga marrëdhënia e punës“ të ankuesit [REDAKTUAR]

Kolegji për shqyrtimin dhe vendosjen e ankesave, gjatë shqyrtimit të shkresave të lëndës ka konstatuar se ankuesit [REDAKTUAR] me Vendimin Nr.04/89 të datës 12.02.2019 të Qeverisë së Republikës së Kosovës i është vazhduar mandati edhe 3 vjet në pozitën Kryeshef Ekzekutiv i Agjencisë për Mbrojtjen e Mjedisit në Ministrinë e Ekonomisë dhe Ambientit. Ankuesi me datë 01.10.2020 përmes vendimit me numër 1523 të Ministrit të Ministrisë së Ekonomisë dhe Ambientit është pezulluar nga marrëdhënia e punës me 50% të pagës .

Kolegji për shqyrtimin e ankesave, duke u bazuar në kompetencat kushtetuese dhe ligjore për shqyrtimin e ligjshmërisë në shërbimin civil, ka shqyrtuar ligjshmërinë e Vendimit të Ministrit të Ministrisë së Ekonomisë dhe Ambientit me numër 1523 të datës 01.10.2020 me te cilin ankuesit

i ka shqiptuar masën disiplinore pezullim nga detyra me 50% të pagës deri në marrje të vendimit tjetër. Kolegji për shqyrtimin e ankesave konstaton se ky vendim nuk është nxjerr në pajtim me procedurën e përcaktuar me Ligjin Nr.06/L-114 për Zyrtarët Publikë, respektivisht me nenin 56 të Ligjit Nr.06/L-114 për Zyrtarët Publikë sepse në mënyrë taksative janë përcaktuar rastet kur një nëpunës civil pezullohet nga marrëdhënia e punës, sipas detyrës zyrtare.

Kolegji për shqyrtimin e ankesave, konstaton se Ministri i Ministrisë së Ekonomisë dhe Ambientit me Vendimin me numër 1523 të datës 01.10.2020, me të cilin i ankuesit i ka shqiptuar masën disiplinore pezullimin nga detyra me 50% të pagës ka vepruar në kundërshtim me nenin 48 paragrafin 5 të Ligjit Nr.06/L-114 për Zyrtarët Publikë, me të cilin përcaktohet se: „... komisioni disiplinor mund të vendosë pezullimin e nëpunësit civil ose të marrë çdo masë tjetër të përshtatshme, deri në marrjen e vendimit përfundimtar“ sepse në rastin konkret vetëm Komisioni Disiplinor, respektivisht Këshilli Shtetëror për Vlerësim dhe Disiplinë mund të pezullojë nëpunësin civil te nivelit të lartë drejtues për shkelje të detyrave të punës.

Kolegji për shqyrtimin e ankesave, po ashtu ka konstatuar se Vendimi i Ministrit të Ministrisë së Ekonomisë dhe Ambientit me numër 1523 të datës 01.10.2020 lidhur me pezullimin nga detyra me 50% të pagës se tij deri në marrje të vendimit tjetër, është nxjerr në kundërshtim me dispozitat e Ligjit për Procedurën e Përgjithshme Administrative, gjegjësisht me nenin 47 paragrafi 1 nën paragrafi 1.1, 1.2, 1.3 dhe 1.4 dhe me nenin 48 paragrafi 2 që rregullojnë formën dhe elementet e detyrueshme të aktit administrativ, sepse rrjedhimisht vendimi nuk arsyeton gjendjen faktike dhe bazën juridike siç përcaktohet të Ligjit Nr. 05/L-031 për Procedurën e Përgjithshme Administrative.

Kolegji për shqyrtimin e ankesave, pas shqyrtimit të shkresave dhe dëshmimeve të bashkangjitura në lëndë ka konstatuar se Ministri i Ministrisë së Ekonomisë dhe Ambientit, njëkohësisht me vendimin për pezullimin nga detyra të ankuesit, me datë 01.10.2020 ka dorëzuar edhe shkresën- njoftimin me numër 1524 për Kryeministrin e Republikës së Kosovës dhe Ministrin e Ministrisë së Punëve të Brendshme gjegjësisht Këshillin Shtetëror për Vlerësim dhe Disiplinë, ku ka kërkuar fillimin e procedurës disiplinore ndaj Kryeshefit Ekzekutiv të Agjencisë për Mbrojtjen e Mjedisit në Ministrinë e Ekonomisë dhe Ambientit z. [REDAKTUAR] për shkak të shkeljeve të rënda të detyrës zyrtare.

Kolegji për shqyrtimin e ankesave, konstaton se bazuar në dispozitat e nenit 49 të Ligjit për Zyrtarët Publik, kompetencat e komisionit disiplinor, për nëpunësit e kategorisë së lartë drejtuese në institucionin e administratës shtetërore, ushtrohen nga Këshilli Shtetëror për Vlerësim dhe Disiplinë. Andaj, Kolegji vlerëson se Këshilli Shtetëror për Vlerësim dhe Disiplinë pas shqyrtimit të shkresës-njoftimit të datës 01.10.2020 të Ministrit duhet të konstatojë saktë dhe duke u mbështetur me fakte shkeljet eventuale, arsyet në rast se vazhdimi i ushtrimit të detyrës nga ankuesi e pengon hetimin disiplinor apo jo, dhe mbi bazën e konstatimeve të nxjerr vendim duke u bazuar në nenin 48, 49 dhe 50 të Ligjit Nr.06/L-114 për Zyrtarët Publikë. Po ashtu Kolegji për shqyrtimin e ankesave, konstaton se Këshilli Shtetëror për Vlerësim dhe Disiplinë duhet të aplikojë përshtatshëm nenin 11, 12 dhe 13 të Rregullores Nr. 11/2020 për Disiplinën dhe Ankesën e Zyrtareve Publike, pasi që sipas nenit 25 të Rregullores Nr. 15/2020 për Pranimin, Vlerësimin dhe Disiplinën e Nëpunësve të Lartë Drejtues „procedura disiplinore fillon, zhvillohet dhe

përfundohet, në pajtim me dispozitat përkatëse për disiplinën e zyrtareve publike” respektivisht të vendose lidhur me „pezullimin nga marrëdhënia e punës” të ankuesit .

Prandaj marrë parasysh nga ajo që u tha në arsyetimin e këtij vendimi, Kolegji për shqyrtimin e ankesave nuk është lëshuar në trajtimin e lëndës në përmbajtje, sepse është konstatuar se Vendimi i Ministrisë të MEA-së ka lëshime procedurale të tilla që nuk lejojnë trajtimin e tij, Kolegji duke mos paragjykuar përgjegjësin disiplinore të ankuesit, obligon Këshillin Shtetëror për Vlerësim dhe Disiplinë që të veproj konform dispozitave ligjore të lartshënuara.

Bazuar në këto rrethana, Kolegji për shqyrtimin e ankesës, me shumicë të votave, pas analizimit dhe vlerësimit të të gjitha shkresave të lëndës dhe provave të ofruara nga palët, si dhe duke u bazuar në kompetencën e Këshillit, vendosi si në dispozitiv të këtij Vendimi. Anëtari i Kolegjit i cili ka dhënë mendim mospajtues me këtë vendim, duhet të jap me shkrim mendimin mospajtues dhe i njëjti duhet t’i bashkëngjitet dosjes së lëndës

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë -Departamenti Administrativ, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalin ekzekutimin e këtij vendimi.

Këshilli i Pavarur Mbikëqyrës për Shërbimin Civil të Kosovës

Lënda me numër A nr.288/2020

Rushit Kajtazi


Procesmbajtës

Malsore GASHI BAJRAKTARI

Kryetare e Kolegjit

Vendimi i dërgohet

- Aankuesit
- Ministrinë të Ministrisë së Ministrisë së Ekonomisë;
- Sekretariatit të Këshilli Shtetëror për Vlerësim dhe Disiplinë;
- Udhëheqësit të Burimeve Njerëzore në Ministrinë e Ekonomisë; dhe
- Arkivit të KPMSHCK-së.



Republika e Kosovës Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBEKOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.288/2020

Këshilli i Pavarur Mbikëqyrës për Shërbimin Civil të Kosovës – Jeton Koca, anëtar i Kolegji për shqyrtimin e ankesës A.nr.288/2020 të datës 07.10.2020 të parashtruar nga ankuesi [REDACTED] me adresë banimi, Lagjja "Qëndresa", Komuna e Prishtinës, kundër Vendimit me numër 1523 të datës 01.10.2020 të Ministrisë së Ekonomisë dhe Ambientit, në çështjen juridike "pezullim nga marrëdhënia e punës", duke vepruar në pajtim me nenin 6 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe nenin 17 të Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datën 19.11.2020, paraqet këtë:

MENDIM MOSPAJTUES

me

Vendimin e Kolegjit për shqyrtimin e ankesave në rastin e shqyrtimit të ankesës A.nr.288/2020 të datës 07.10.2020 të parashtruar nga ankuesi [REDACTED]

Arsyetim

Kolegji për shqyrtimin e ankesave në përbërje nga: Malsore Gashi-Bajraktari -kryetare, Eshref Shabani dhe Jeton Koca-anëtar, ka shqyrtuar ankesën me numër A.nr.288/2020 të datës 07.10.2020 të parashtruar nga ankuesi [REDACTED] kundër Vendimit me numër 1523 të datës 01.10.2020 të Ministrisë së Ekonomisë dhe Ambientit, në çështjen juridike "pezullim nga marrëdhënia e punës". Pas shqyrtimit dhe analizimit të shkresave të lëndës dhe pas diskutimeve të mbajtura, Kolegji për shqyrtimin e ankesave, me shumicë të votave ka marr vendim me të cilin:

I.SHFUQIZOHET Vendimi me numër 1523 i datës 01.10.2020, i Ministrit të Ministrisë së Ekonomisë dhe Ambientit.

II. OBLIGOHET Këshilli Shtetëror për Vlerësim dhe Disiplinë, që brenda afatit prej 15 ditësh nga dita e pranimit të këtij vendimi, të shqyrtoj lëndën sipas shkresës-njoftimit me numër 1524 të datës 01.10.2020, të parashtruar nga Ministri i Ministrisë së Ekonomisë dhe Ambientit.

III. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

IV. Vendimi hyn në fuqi në ditën e nënshkrimit nga Kryetari i Kolegjit.

Bazuar në dispozitat e nenin 6 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës si dhe dispozitat e nenit 17 të Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në cilësinë e anëtarit të Kolegjit për shqyrtimin e ankesave, në seancën për këshillim dhe votim, me respekt ndaj dy anëtarëve që kanë përbërë shumicën në Kolegji, kam dhënë mendim mospajtues lidhur me vendimin A.nr.288/2020 të datës 19.11.2020, për arsyet e ofruara si në vijim:

Lidhur me pretendimin ankimor të ankuesit se Vendimi me numër 1523 i datës 01.10.2020 për pezullim nga detyra është nxjerr nga organi jo kompetent, Kolegji për Shqyrtimin e ankesave, ka konstatuar se me dispozitat e nenit 56 të Ligjit Nr.06/L-114 për Zyrtarët Publikë janë përcaktuar në mënyrë taksative rastet kur një nëpunës civil pezullohet nga marrëdhënia e punës, sipas detyrës zyrtare. Kolegji ka vlerësuar se nëpunësi civil i nivelit të lartë drejtues, për shkelje të detyrave të punës mund të pezullohet vetëm nga Komisioni Disiplinor, respektivisht Këshilli Shtetëror për Vlerësim dhe Disiplinë, siç parashihet me Ligjin Nr.06/L-114 për Zyrtarët Publikë, përkatësisht nenin 48 paragrafi 5, ku përcaktohet se: *Nëse ka arsye të besohet se vazhdimi i ushtrimit të detyrës nga nëpunësi civil, ndaj të cilit ka filluar një procedurë disiplinore, pengon hetimin disiplinor apo mund të cenojë ushtrimin e përshtatshëm të detyrës së tij, komisioni disiplinor mund të vendosë pezullimin e nëpunësit civil ose të marrë çdo masë tjetër të përshtatshme, deri në marrjen e vendimit përfundimtar.* Përfundimisht në rastin e inicimit të procedurës disiplinore, ku kompetent për pezullimin e nëpunësit civil është Komisioni Disiplinor, në të gjitha rastet tjera të përcaktuara në dispozitat e nenit 56 të Ligjit për Zyrtar Publik, kompetent për konstatimin e shkakut të pezullimit për nëpunësit civil të nivelit të lartë drejtues, në institucionet e administratës shtetërore, është ministri përgjegjës për administratën publike, kështu që Kolegji ka konstatuar se pretendimi ankimor i ankuesit është i bazuar.

Kolegji për shqyrtimin e ankesave, lidhur me pretendimin ankimor të ankuesit se vendimi për pezullim nga detyra është nxjerr në kundërshtim me dispozitat që rregullojnë procedurën disiplinore, ka konstatuar se sipas dispozitave të nenit 48 paragrafi 2 të Ligjit për Zyrtarët Publik, mbikëqyrësi i drejtpërdrejtë është i detyruar të fillojë procedurën disiplinore mbi bazën e fakteve konkrete dhe të provuara për shkeljen e detyrimeve nga nëpunësi civil, dhe është kompetent të shqiptojë vetëm masën disiplinore të vërejtjes, ndërsa për shqiptimin e të gjitha masat tjera disiplinore të përcaktuara me nenin 47 të Ligjit për Zyrtarët Publik, kompetent është Komisioni Disiplinor, ndërsa për pozita të nivelit të lartë drejtues kompetent është Këshilli Shtetëror për Vlerësim dhe Disiplinë. Andaj, Kolegji në mënyrë unanime ka vlerësuar se Ministri i Ministrisë së Tregtisë dhe Industrisë, me rastin e nxjerrjes së vendimit për pezullimin nga detyra të ankuesit ka vepruar në kundërshtim me procedurën e përcaktuar me Ligjin Nr.06/L-114 për Zyrtarët Publikë, përkatësisht nenin 48 paragrafi 2 ku përcaktohet se: *Mbikëqyrësi i drejtpërdrejtë detyrohet të fillojë procedurën disiplinore mbi bazën e fakteve konkrete dhe të provuara për shkeljen e detyrimeve nga*

nëpunësi civil, dhe paragrafin 5 ku përcaktohet se: ... komisioni disiplinor mund të vendosë pezullimin e nëpunësit civil ose të marrë çdo masë tjetër të përshtatshme, deri në marrjen e vendimit përfundimtar.

Ndërsa, lidhur me pretendimin ankimor të ankuesit se Vendimi me numër 1523 i datës 01.10.2020 për pezullim nga detyra, është nxjerr në kundërshtim me dispozitat që rregullojnë formën dhe elementet e detyrueshme të aktit administrativ, Kolegji për shqyrtimin e ankesave po ashtu në mënyrë unanime ka konstatuar së struktura dhe elementet e detyrueshme të aktit administrativ janë të përcaktuara me dispozitat e Ligjit për Procedurën e Përgjithshme Administrative, dhe ka vlerësuar se Vendimi me numër 1523 i datës 01.10.2020 për pezullim nga detyra është në kundërshtim me nenin 47 paragrafi 1 nën paragrafi 1.1, 1.2, 1.3 dhe 1.4 të Ligjit Nr.05/L-031 për Procedurën e Përgjithshme Administrative, rrjedhimisht vendimi nuk arsyeton gjendjen faktike dhe bazën juridike siç përcaktohet me nenin 48 paragrafi 2 të Ligjit Nr.05/L-031 për Procedurën e Përgjithshme Administrative, kështu që Kolegji në mënyrë unanime ka konstatuar së pretendimi ankimor i ankuesit është i bazuar.

Pra, siç shihet në pjesën arsyetuese të vendimit, Kolegji për shqyrtimin e ankesave, në mënyrë unanime ka konstatuar së Vendimi me numër 1523 i datës 01.10.2020 për pezullimin e ankuesit nga detyra me 50% të pagës, është nxjerr nga organi jo kompetent; në kundërshtim me procedurën e përcaktuar administrative; dhe në kundërshtim me dispozitat ligjore që përcaktojnë strukturën dhe elementet e detyrueshme të aktit administrativ, dhe ka aprovuar pretendimet e ankuesit si të bazuar.

Andaj, duke u bazuar në dispozitat e Ligjit Nr.05/L-031 për Procedurën e Përgjithshme Administrative, përkatësisht neni 52 paragrafi 1 i cili përcakton se një akt administrativ është i paligjshëm, nëse: *1.2 organi publik që e nxjerr ka vepruar pa pasur kompetencë, 1.3 është rezultat i shkeljes të dispozitave lidhur me procedurën administrative dhe 1.4 është nxjerre në kundërshtim me dispozitat që rregullojnë formën apo elementet e detyrueshme të aktit administrativ*, në cilësinë e anëtarit të Kolegji për shqyrtimin e ankesave, konsiderojë së konstatimi i anëtarëve tjerë që përbejnë shumicën në Kolegji, se ka bazë ligjore që Vendimi me numër 1523 i datës 01.10.2020 për pezullimin e ankuesit nga detyra, të shfuqizohet dhe të detyrohet Këshilli Shtetëror për Vlerësim dhe Disiplinë për shqyrtimin e lëndës, nuk është në përputhje me dispozitat ligjore në fuqi, përkatësisht nenin 18 paragrafi 1 nën paragrafi 1.2 dhe 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, dhe nenin 53 paragrafi 1 dhe 2, si dhe nenin 55 paragrafi 1 të Ligjit Nr.05/L-031 për Procedurën e Përgjithshme Administrative.

Bazuar në dispozitat e nenit 18 paragrafi 1 nën paragrafi 1.2 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji për shqyrtimin e ankesave në rast kur konstaton se pretendimet e palës janë të bazuara duhet të aprovoje ankesën dhe të anulojë apo shfuqizojë aktin administrativ i cili është goditur me ankesë. Andaj, duke marr parasysh së pretendimet e ankuesit lidhur me shkeljet procedurale janë aprovuar si të bazuara, konsiderojë se Vendimi me numër 1523 i datës 01.10.2020 për pezullimin e ankuesit nga detyra është dashur të anulohet, me qëllim të vendosjes se ligjshmërisë siç përcaktohet me nenin 53 paragrafi 1 dhe 2, si dhe nenin 55 paragrafi 1 të Ligjit Nr.05/L-031 për Procedurën e Përgjithshme Administrative.

Ndërsa lidhur me detyrimin e Këshillin Shtetëror për Vlerësim dhe Disiplinë që ta shqyrtojë lëndën sipas shkresës-njoftimit me numër 1524 të datës 01.10.2020, të parashtruar nga Ministri i

Ministrisë së Ekonomisë dhe Ambientit, në cilësinë e anëtarit të Kolegjit konsideroje së kjo pike e dispozitivit të vendimit nuk është në përputhje me dispozitat ligjore në fuqi, përkatësisht nenit 18 paragrafi 1 nen paragrafi 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, sepse me as një shkresë të lëndës nuk është konstatuar së Këshilli Shtetëror për Vlerësim dhe Disiplinë ka refuzuar trajtimin e kësaj lëndë, për me tepër kjo nuk është kërkesë e palës ankuese.

Pra, derisa Kolegji për shqyrtimin e ankesave ka konstatuar se janë plotësuar kushtet ligjore që Vendimi me numër 1523 i datës 01.10.2020 për pezullimin e ankuesit nga detyra të shpallet i paligjshëm, në cilësinë e anëtarit të Kolegjit, vlerësojë së ekziston baza ligjore që ankesa e ankuesit të aprovohet dhe Vendimi me numër 1523 i datës 01.10.2020 të anulohet, andaj mbi këtë bazë, mendimi im në Kolegji ka qenë që të:

- I. **APROVOHET** si e bazuar ankesa më numër A.nr.288/2020 e datës 07.10.2020 e parashtruar nga ankuesi [REDAKTUAR].
- II. **ANULOHET** Vendimi me numër 1523 i datës 01.10.2020 i Ministrit të Ministrisë së Ekonomisë dhe Ambientit.
- III. **OBLIGOHET** Ministri i Ministrisë së Ekonomisë dhe Ambientit, që të kthej në pozitën e Drejtorit Ekzekutiv në Agjencinë për Mbrojtjen e Mjedisit, ankuesin [REDAKTUAR], me të gjitha të drejtat dhe detyrimet nga marrëdhënia e punës, dhe të bëjë kompensimin e 50% të pagës nga dita e pezullimit deri në zbatimin e këtij vendimi.

Këshilli i Pavarur Mbikëqyrës për Shërbimin Civil të Kosovës
Lënda me numër A.nr.288/2020


Jeton KOCA
Anëtar i Kolegjit

Vendimi i dërgohet

- Aankuesit [REDAKTUAR];
- Ministrit të Ministrisë së Ekonomisë dhe Ambientit;
- Sekretariatit të Këshilli Shtetëror për Vlerësim dhe Disiplinë;
- Udhëheqësit të Burimeve Njerëzore në Ministrinë e Ekonomisë dhe Ambientit; dhe
- Arkivit të KPMSHCK-së.